



**JUDICIAL SYSTEM MONITORING PROGRAMME**  
**PROGRAMA DE MONITORIZAÇÃO DO SISTEMA JUDICIAL**

*Komunikadu Imprensa*

**Periodu : Marsu 2011**

**Edisaun : 24 Marsu 2011**

**Parlamentu Nasionál Hahú Implementa Lian Português iha  
Plenária**

Iha Tersa Feira 22 Marsu 2011 sai loron istóriu ba Parlamentu Nasionál tanbá hahú implementa ka uza lian Português iha plenária Parlamentu Nasionál bazeia ba Projeitu Rezolusaun Nu. 51/II konabá uza lingua Tetun no Português hanesan lingua ofisial ne'ebé aprova iha loron 26 Ootobru 2010 atu hasa'é nivél koñesimentu deputadu sira.

Diretór JSMP Luis de Oliveira Sampaio haktuir katak JSMP respeito esfórsu Parlamentu Nasionál atu enkoraja membru deputadu sira hodi aprende lingua Português atu refleta espiritu Artigu 13 Konstituisaun, maibé la'ós atu difikulta ka impede efisensia no produtividade serbisu deputadu sira iha forum plenaria nia laran. Tanbá JSMP fiar katak Uma Fukun Parlamentu Nasionál la'ós fatin ba deputadu sira hodi aprende lian Português maibé Parlamentu Nasionál, nu'udar fatin atu deskuti konabá distinu povu nian, interese povu nian no futuru povu nian.

JSMP fiar katak iha dalan barak atu aprende ka hasa'é koñesimentu deputadu sira iha lingua Português ka area sira seluk, maibé la'ós iha Parlamentu Nasionál. Tanbá JSMP fiar katak aleinde la produtivu, Parlamentu Nasionál ne'e mós la fatin ne'ebé apropriadu atu aprende. Tuir JSMP nia observaun iha loron dahuluk implementasaun lingua Português JSMP deskobre katak, iha difikuldade boot tebes ba membru deputadu sira atu espresa sira nia opiniaun, nune'é membru deputadu barak liu mak hili atu nonok deit.

Iha rekomendasaun relatóriu anuál Sub Unidade Programa Observasaun JSMP nian iha tinan 2010, subliña Parlamentu nia difikuldade tanbá deputadu balu dehan la bele halo análise di'ak ba esbosu lei sira tanbá barak liu uza lingua Português no deputadu sira la kompriende.

JSMP hanoin katak, importante liu ba Parlamentu Nasionál atu enkoraja deputadu sira kontribui atu ativu, krítiku no efetivu ba responsabilidade serbisu ne'ebé sira nia konstuente ka povu Timór Léste tomak ne'ebé fó fiar ba deputadu sira atu reprezenta sira iha Uma Fukun Parlamentu Nasionál, la'ós obriga deputadu sira atu koalia Português, tanbá polítika ne'e sei fo desvantagem barak liu duque nia vantagem ba deputadu sira rasik no ba públiku Timór Léste injeral.

Taná ne'e JSMP kontinua enkoraza Parlamentu Nasionál atu bele kontinua debate ho liangua ne'ebé ema hotu bele partisipa bele fasilita diak liu tan deputadu sira no fó asesu ba ema hotu atu halo análiza ba lei ka asuntu sira ne'ebé direktamente afeta ba povu sira nia moris. Mesmu nune'e, JSMP mós enkoraza deputadu sira atu aprende ka uza lian Português iha Parlamentu Nasionál iha momentu ne'eba

Atu hetan infórmasaun kle'an favor kontaktu:

Luis de Oliveira Sampaio

Direitor Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

Landline: 3323883